

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Nunavut peqatigalugu pisortatigoortumik ataatsimoorussamik suleqatigiiffimmik pilersitsinissamut Naalakkersuisut Inatsisartoqarfirmilu Siulersuisoqarfik Nunavummi inatsisartunut naalakkersuisuinullu saaffiginnissuteqarnissaannik piumaffigeqqullugit Inatsisartut aalajangigassaattut siunnersuut.

(Inatsisartunut ilaasortaq Aki-Matilda Høegh-Dam, Naleraq)

Tunngavilersuutit:

Nunat allat, namminneq naalakkersorfimminniittut ataatsimoorlutik suleqatigiiffeqarlutik inuiaat allat akimut peqatigalugit suleqatigiissitanik pilersitsisarput.

Ilai soorlu Saminik inatsisartutugit isumalioqatigiissitamik taaguuteqarput. Allat aamma allatut taaguuteqarput, soorlu Nunat Avannarliit Isumalioqatigiissitaat, assigisaallu.

Suleriaatsilli taakkorluinnaat kisianni sulii atorineqartut piupput nunasiaataasimanitsinnit tunuliaquteqarlutik ingerlanneqarsimasut. Nunat Avannarliit Europamilu nunaneersut sinneruttunit ingerlateqqinneqarsimasut. Ilusilersorneqarsimasunik pioreersunut ilaavugut ilaasimallutalu, taakkulu kulturit allat anguniakkallu allat aallaavigalugit pilersinneqarsimapput. Anguniakkat naleqqussarfiginiarsarisartakkavut nalimmassarfiginiarsaralugillu ingerlaffigiuannakkagut.

Tamakku qeqqanni allat ilusilersugaat atuuttut naleqqussarfiginiartillutigik, nammineerluta arlaannik peqquteqarluta inatsisartuni nunanut eqqaamiutsinnut qaninnerpaanut suleqatigiissitanik pilersitsinissamut pisinnaasimanngilagut. Tassalu kimmut nuna qaninnerpaaq: Nunavut.

Piffissanngorpoq kimmut isigilernissatsinnut. Piffissanngorpoq qanigisatsinnut qaninnerpaanut qiviarnissarput, tassaasoq nuna avitseqaterput qaninnerpaaq. Nunavut 1999-imiilli nammineq inatsisartoqarpoq naalakkersuisoqarlunilu. Assigiiffippassuaqaraluarpugut. Inunnit kingoqqisuuvugut, imartarujussualimmi nunallu annertuut naassaangitsunik periarfissallit.

Taamaattorli piffiit marluk akornanni toqqaannartumik naalakkersuinikkut inatsisartutigullu suleqatigiinnik peqanngilagut marluulluta sumiiffimmi akornitsinni. NGO-t kisiisa naatsorsuutigiinnarsinnaanngilagut, naalagaaffiillu allat misileraasut uagut tamat oqartusaaqataanitsinni ilusilersorneqarnerput qulaatiinnarlugu.

Asasakka ilaasortaqaatit uagut nammineq tamat oqartusaaqataanitsinni inissisimaqatikka, nutaamik aallartitsisa. Nammineq naalakkersuisoqarfivut inatsisartoqarfivullu aqqutigalugit nutaamik ataatsimoorfimmik pilersitsisa.

Naqissuserneqassaaq, una aalajangiiffigisassatut siunnersuut isumaqanngilaq ilaasortaaffinnik allanik aamma inatsisartutigut suleqatinik ingerlareersunik mattussissasoq. Akerlianilli, aalajangiiffigisassatut siunnersuutip siunertaraa naalakkersuisutta inatsisartuttalu akornanni toqqaannartumik aqqummik pilersitsinissaq.

Qanoq kinguneqarumaarnera uagut Inatsisartut, Naalakkersuisut innuttaasut akornitsinni aalajangissavarput. Nammineq naggueqatigut saaffigalugit, annertunerusumik toqqaannarnerusumillu inatsisartutigut naalakkersuinikkullu attaveqatigiinneq aallarnerlugu alloriarta, tassuunakkut aalajangiiffigisassatut siunnersuutip siunertaa piviusunngortillugu.

Taamatut oqaaseqarlunga Inatsisartut siunnersuummik suliaqarluarnissaannik kissaappakka.

Pisortanut aningaasatigut allaffissornikkullu kingunerisassai:

Pisortanut aningaasatigut allaffissornikkullu kingunerisassai isumaliuutersornarput, kisianni naligninnaasumik minnerusumik aningaasartuutitaqassalluni.

Aalajangiiffigisassatut siunnersuutip piviusunngortinnissaanut naligninnaasumik angalanissamut aningaasartuuteqarsinnaavoq, aamma isumaqatigiissuteqarluni atsioqatigiinneq imaluunniit assigisaanik pisoqarsinnaalluni, tamanna AC-fuldmægtigimik aningaasartuuteqarnermit annikinnerussaaq nutserisitsinerit oqaatsit atorineqartut akornanniittut ilanngullugit sinaakkutit atuuttut iluanni suliarineqarsinnaammata.

Piviusunngortitsineq taama annertutigisumik inatsisartut akimorlugit suleqatigiissitaliornermi suullu toqqammaviussanersut isumaqataassutigineqaratarsinnaanersut uani aalajangiiffigisassatut siunnersuummi sinaakkutit avataanniipput.

Namminersortunut aningaasaatigut allaffissornikkullu kingunerisassai:

Soqanngilaq.



Innuttaasunut aningaasatigut allaffissornikkullu kingunerisassai:
Soqanngilaq.